

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. Chakma Autonomous District Council Governors Rule chu thla 6 dang atan pawhsei leh a ni.
2. Chief Minister, Pu Lalduhoman Sairang Horticulture Centre-a Ginger Processing Unit vawiin khan a hawng.
3. Indian Army Chief General Upendra Dwivedi chuan chuan Operation Sindoor kha ramchhunga sipai chi thum tri-service te thawhhona thatzia entirtu a ni a ti..
4. Union Minister of State for Personnel, Public Grievances and Pensions Dr Jitendra Singh chuan Viksit Bharat G-RAM-G Act chuan sawrkar tangka kum khatah chhungkaw khat tan ni 125 inhlawhna a siam dawn a ti.

<><><>

**CADC GOVENORS RULE EXTENDED**

Chakma Autonomous District Council Governors Rule chu thla 6 dang atan pawhsei leh a ni.

Nimina Governor thuchhuah tarlan danin, Governors Rule hi tun thla ni 7 atanga hman tan turin thla 6 dang atang pawhsei a ni a, he thutlukna siam anih chhan hi District Council Member (MDC) zingah party zuanlawr avanga sorkarna siam hlei thei lova an awm thin vang leh Inquiry Commission Report nghah mek a nih vang tih thuchhuahah chuan tarlan a ni.

Governor's Rule chhung Chakma Autonomous District Council thuneihna leh kalphung zawng zawng chu Lawngtlai District Deputy Commissioner-in Governor aiawhin a enkawl ang.

Governor hian CADC chhunga sorkar ngelnghet din theih loh chhan leh an politics te zirchiang turin Lawngtlai DC kaihhruai Inquiry Commission din thar a nih thu nimin vek khan thuchhuah siamin a sawi a, CADC inrelbawlna chungchang bakah hnalak chungchanga thilfello awm te enfel tura tih a ni.

Hemi chungchang hi Council of Minister te a rawn hnuah, annih chhui nawn ngai ti lo mahse chhui nawn a duh zawk avangin chhui tu tur Inquiry Commission hi din a ni tih thuchhuahah chuan a sawi.

Hetihlai hian BJP Mizoram Pradesh chuan Mizorama Autonomous District Council pahniha sorkarna ngelnghet a ding thei lo chu pawl an tih thu a sawi a; Autonomous District Council-ah anti-defection law hman a nih theih nan hma an la an ti.

BJP Mizoram State General Secretary Pu Delson Notlia chuan vawiina Aizawl Press Club-a thuthar thehdarhtute nen an inkawmnaah zawhna chhangin Governor hian CADC-ah thil dik lo a awm ngei nia a hriat avangin Governor's Rule chu a pawtsei niin a lang a ti a, BJP chuan sorkarna siam turah tel ve ngei an duh thu a sawi rualin, political development kal mek a nih avangin thuchiang a sawi theih loh thu a sawi bawk.

BJP chuan Autonomous District Council-ah te hian sorkar ngelnghet awmse an duh thu leh thlantlin tawhten an awmna party an thlak fo thin chu a tawp theih nan ADC-ah anti-defection law hman an duh a ti a, 6th schedule hnuaiha hian India ramah Council 10 an awm a, Supreme Court-in heng council-te hian 10th Schedule hnuaiha anti-defection law chu an hman ve thei loh avangin vawiin thleng hian ADC-ah party inthlak a awm, a ti a, hei hi an vei thu leh hemi titawp tur chuan 6th Schedule hi tihdanglam a ngaih thu a sawi.

CADC ah hian ZPM chuan MDC 16 a neih thu chhalin tun thla ni 7 khan MDC te hian sorkarna an siam theih thu Governor an hrilh a, hemi hnu ni 13 khan ZPM MDC16 zinga 5 in BJP an zawm a, tunah hian ZPM chuan MDC 11 a nei ta a ni.

**(Ranbir CADC/ Johnny CORR)**

<><><>

**SAWHTHING PROCESSING UNIT**

Chief Minister, Pu Lalduhoman Sairang Horticulture Centre-a Mizoram Agricultural Marketing Board-in Bana kaih (Handholding) Scheme hnuai a din, Ginger Processing Unit chu a hawng. He hun hi Horticulture Minister Pu C. Lalsawivungan a hmanpui.

Thu sawiin Chief Minister chuan, UT nih a chin kum 54 vel a ni tawh a, loneia eizawng tamna state ni chungin eng thlai mah a la hmingthanpui ngai lo a. Tunah chuan Mizoram chu Ginger Capital of India tia hriat a ni chho tan ta a ti a. Loneitute thawh rah zarah Mizoram chu a hmingthang chho mek a, Sapthei pawh nasa taka kalpui a larpui thama ngah an tum leh dawn a ti.

Pu Lalduhoma chuan Sawhthing vangin chhungkaw tam takin sum leh pai tam tak an lalut a, mipuiten pawisa an neih avangin sumdawngte tan a lo hlawk a, kohhran thawhlawm chenin a pung a ti a. A thlawna sem an ti tawp a, moral reformation a thleng mek a, miin mahni thawhrim rah ngei an tel mek chu a hlu a ni, a ti.

Sawhthing chu thlaleh February ni 2 atangin an lei tan leh dawn tih sawiin Mizo kutchhuak, a zailepna khawl leh a tihrona khawl eng emaw zat hi collection centre-a dah a, an lo hman theiha chhawpsak an rilruk mek a, chu chuan sawhthing process-na kawngah a pui nasa hlein an ring ti.

Mizoram Agricultural Marketing Board (MAMB) chuan Sairanga Horticulture Centre hmun hma leh building thenkhatte chu private company enkawl tyurin October ni 17 khan dilna an hawng a, a chhang tu Good Faith, Saron veng te chu thlan chhuah an ni.

Anni hnenah hian Mizoram Agricultural Marketing Board chuan Horticulture Centre-a building hrang hrang, Transit Godown, Integrated pack house, Manager quarter leh Chowkidar quarter te MOU fel ziak in kum 5 chhung atan vawiin khan a hlan a ni.

Good Faith hian kum 2025 chhungin an theih ang anga ginger processing leh marketing an kal pui mek laiin, Mizoram Agricultural Marketing Board chuan, Horticulture Centre-a Transit Godown-ah hian cheng nuai 71 sengin ginger processing line (khawl) a bun a. He processing unit pawh hi Good Faith enkawl nghal tura tih a nih angin, vawiin hian Mizoram Agricultural Marketing Board leh Good Faith ten MOU sign nghal a ni.

## **(DIPR)**

<><><>

### **MJA**

BJP Mizoram chuan sorkar laipuiin scheme a duan thar - Viksit Bharat - Grameen Rojgar Aur Aajivika Guarantee Mission (Rural)/ G-RAM-G chu mirethiete tan malsawmna a nih dawn thu an sawi a; G-RAM-G hnuai hian ni 15 chhunga an inhlawhna hlawh pek an nih loh chuan state sorkarin an hlawh pangngai tur bakah zangnadawmna (compensation) a pek tel a ngai dawn tih an sawi.

Vawiin khan BJP Mizoram hruaitute chuan Aizawl Press Club-ah thuthar thehdarhtute kawmin, BJP Mizoram State General Secretary Pu Delson Notlia chuan G-RAM-G hnathawh dan te a sawifiah a, Mizoram sorkarin a tum ve tur zaa 10 hi a hunah a pek theih loh a, ni 15 chhunga G-RAM-G beneficiary-ten an hnathawh hlawh an lak loh chuan state sorkarin compensation a pek angaih dawn thu a sawi a; MGNREGA hnuai Mizoram sorkarin matching share a pek that thin avangin G-RAM-G hnuai pawh tha taka pawisa a pek theih an beisei thu a sawi.

BJP Mizoram State General Secretary Pu Lalfakzuala Hauzel pawhin ram mipuite ngaihtuatu sorkar awmna apiang chu ram hmasawn an nih thu sawiin, BJP sorkarin India ram mipuite hmakhua ngaiin G-RAM\_G hi a duan thu leh G-RAM-G hnuai hian MGNREGA hnuai thil diklo awm thin leh eirukna awm thinte tihbo tum a nih thu a sawi a; G-RAM-G hnuai ni 125 inhlawhna awmah hian loneitute buh seng lai leh lo lama an buai avanga inhlawhna siam theih loh laiin ni 60 chawlh a lak theih dawn thu a sawi bawk.

BJP Mizoram Joint Treasurer Pi Lalremsangi Fanai chuan Mizoram job card nei 2,13,000 an awm a ti a; MGNREGA hnuai khan jobcard lem te a awm thin a, chu chuan central sum tam tak a eiral thin thu sawiin, G-RAM-G hnuai chuan tunlai thiamna sang tak tak hmangin heng eirukna leh thil fel lo awm thinte hi tihbo tum a nih dawn a ti. G-RAM-G hnuai hian khawtlangin a mamawh hrang hrang siam a, eichawp atana hman tur sum lakluh mai ni lo, chhungkaw tina khawsak chawisanna tur hmasawmna thlen chu a tum ber a nih thu a sawi bawk a ni.

## **(Hruaia Aizawl PTC)**

<><><>

### **EXCISE MINISTER**

Excise & Narcotics Minister Pu Lalnghinglova Hmar chuan vawiin khan Champhaia DC Conference Hallah Champhai sawrkar leh khawtlang hotute ruihhlo do chungchang a sawipui a, Champhai Bawrsap Pu Mohammad Aaquib chuan meeting a kaihruai.

He hunah hian Champhai SP Pu Lokeshwaran R chuan Champhai Police ruihhlo do kawnga an hnathawh hrang hrang a sawi a, Excise & Narcotics Asst. Commissioner Pu C. Thangchuanga'n an department hnathawh a tarlang bawk. Heng bakah hian Assam Rifles, Social Welfare leh YMA lamin an hmalakna an sawi bawk.

Minister Pu Lalnghinglova Hmar chuan Champhaia ruihhlo dona a fak a, an hnathawh tha chhonzawm zel turin a fuih a. Border district a nihna angin ruihhlo lut leh chhuak a tam bik a, Mizo mipuite ruihhlo in a tihbuai loh nan Champhai district hian chanvo lian tak a nei tih a sawi. Khawtlangah mipui, a bikin naupang leh thalai zingah kohhran te, khawtlang te leh sawrkarin ruihhlo ti lo turin au chhuahpui nasa

zual turin a chah bawk a, sikul tinah awareness campaign tun kum chhungin vawi khat tal buatsaih theih ni se a ti bawk. Khawtlang hruaitu leh sawrkar hotute inkarah thawhhona tha awm se a tih thu a sawi bawk a, ruihhlo do kawngah Champhai district a tul ang zelin sawrkarin a pui ang tih a sawi bawk a ni.

Champhai Police hian kum 2025 chhung khan NDPS Act hnuaiah case 149 an ziaklut a, mi 260 an man. Heroin kg 38.477, methamphetamine kg 622.4, crystal meth kg 5.169, caffeine kg 3,000, alprazolam kg 4.470 leh corex gram 1.6 an man bawk.

Ruihhlo man runpui Operation Jericho an kalpui bawk a, nikum khan Phase I a zo a, mi 52 manin motor 17 an man a, heroin kg 9.235, methamphetamine kg 74.852 leh BEDC litre 565 an man a, tun thla January atanga tunkum March thleng hian Phase II an kalpui bawk ang.

Excise & Narcotics, Champhai chuan kum 2025 chhungin MLP Act hnuaiah mi 183 an man a, NDPS Act hnuaiah mi 132 an man baw. Heroin kg 14.577, methamphetamine kg 125.065, BEDC litre 2,733.100 leh country liquor litre 884.800 an man a, drug awareness campaign vawi 15 an kalpui bawk.

**(Lahlpuia Champhai PTC)**

<><><>

**EXCISE MINISTER- KHAWZAWL**

Excise & Narcotics Minister Pu Lalngchinglova Hmar hian Khawzawl DC Auditorium-ah District Level Task Force on Ruihhlo Do meeting a neihpui a.

Minister Pu Lalngchinglova Hmar chuan Ruihhlo dona kawnga District Level Task Force hmalakna te tha a tiin a aia nasa leh zuala tan la turin kalkhawm te chu a fuih a. Khawzawl town a ruihhlo ti te chu an tlem a an thenfai theih nan tun aia nasa leh zuala hma la turin a chah a ni. School tinah ruihhlo chungchanga awareness chu neih nise a ti bawk.

Khawzawl Bawrsap Pu K. Vanlalthiana chuan NGO ho te chu tun thla tawp lamah ruihhlo do kawnga hma lak dan tur rel ho ni se, meeting koh ni se tih a rawt nghal a. Police te leh excise te leh NGO te ruihhlo do kawngah tun aia tha a an thawh ho a beisei thu a sawiin a fuih bawk a ni.

**(Lalsangpuii Khawzawl PTC)**

<><><>

**AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

**ARMY GENERAL**

Indian Army Chief General Upendra Dwivedi chuan chuan Operation Sindoor kha ramchhunga sipai chi thum tri-service te thawhhona thatzia entirtu a ni a ti. Vawiina New Delhi-a chanchinbumite a kawmnaah he thu hi sawiin General Dwivedi chuan Operation Sindoor ah khan sipaiten zalen takin hmelma lo bei let turin hun tha an nei a ti a. He operation hi a la kal mek tih sawiin hmelmaten ram dodal zawnga chetna an neih chuan na taka chhanlet zel a ni ang a ti bawk. General Dwivedi chuan Pahalgam-a firfiakte chetna avangin thuneitu sangten huai taka thutlukna siamin firfiakte hi chhanlet nghal an ni a ti a. Operation Sindoor ah hian firfiakte inkulhna hmunhma kahchhiat niin nuclear hmanga invauna awm thin pawh tihtawp a ni a ti a. Sipaiten an bitum tura an tih hmun pakaw zinga pasarih an kapchhia tih sawiin Pakistan chet dan chu awmze nei taka chhanlet a ni a ti a. Nikum May ni 10 atang khan Western Front leh Jammu and Kashmir chhehvel boruak a rip hle a, mahse hei pawh hi thunun a ni a ti a. Nikum chhungin firfiak 31 kahhlum niin an zinga zaa 65 chu Pakistan mi leh sa an ni a ti bawk.

**(NewsonAIR)**

<><><>

**JITENDRA SINGH**

Union Minister of State for Personnel, Public Grievances and Pensions Dr Jitendra Singh chuan Viksit Bharat G-RAM-G Act chuan sawrkar tangka kum khatah chhungkaw khat tan ni 125 inhlawhna a siam dawn a ti. Vawiina New Delhi-a VB G-RAM-G chungchanga chanchinbumite a kawmnaah Pu Singh-a chuan he scheme hian ni 60 chhung lo lam hna thawhna hun chawlh lailaw siam a ni a ti a. Hei bakah hian digital hmanga hnathawh vil anih dawn avangin job card lem tam tak tihbo a ni ang a ti bawk.

<><><>